

بِسْمِ اللَّهِ الرَّحْمَنِ الرَّحِيمِ

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَسُولُ اللَّهِ

KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

Jalsa Salana 2019

01 Novembre 2019

03 Rabi'ul Awwal 1441 AH



Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

BANE MUSULMANS DANS LA POLITIQUE (PARTIE 2)

Mons. Le P.M (Premier Ministre) pé dire ki ena développement dans 4 coins l'île. Pas vrai, sa causer là Mons. Le P.M! Dire ena certain l'endroit spécifiques kot ena développement ene lors l'autre. Nous cite ene seul l'exemple ki frappe aux yeux et ki toute l'île Maurice pé témoigner. C'est la circonscription du Premier Ministre. Tous ministères mobiliser pou faire plaisir le P.M.

Le Premier Ministre pé prépare so terrain bien pou élection ki pou ena là. Mais si seulement sa bane développements ki ena dans so circonscription là ti faire aussi pour les autres circonscriptions. Mais malheureusement sa régime là so mandat pé tire à sa fin et la Communauté Musulmane fine être oublier.

Amène ene seule preuve pour montrer ki développement fine ena dans bane l'endroit kot ena bane minorités et aussi la Communauté Musulmane. Nous pas pé demande amène métré divant nous la porte, couma fine promesse bane habitants Saint-Pierre, mais au moins donne nous jeunesse bane loisirs sains pou zot pas tombe dans l'enfer de la drogue et les autres fléaux, encore faudré bane minorités aveugle pou alle ré-vote bane parti ki fine boycotte développement dans sa l'endroit là. Après tous ki sanlà pou lève la voix dans ene conseil des ministres kot la Communauté Musulmane li sous-représenté et kot péna personne pou lève la voix pou li ? Nous patience, *Insha-Allah*, pour porte so fruits.

LA COMMUNAUTE MUSULMANE PAS NIMAK-HARAM MAIS GARDE LA TÊTE HAUTE.

Ex-Deputy Prime Minister (Ex-Vice Premier Ministre), et maintenant kot li vine simple Député, Soodhun fine accuse la Communauté Musulmane ki li ingrat envers Sir Aneerood Jugnauth (ki ti le Premier Ministre au début 2014-2017 et après ti ena deal papa-piti, kot li faire so garçon vine Premier Ministre, kot sa le peuple là pas ti vote so garçon comme Premier Ministre). Selon Soodhun – ou conner Soodhun li l'ombrage Sir Aneerood Jugnauth – li dire ki la baisse de prix la viande bœuf, billet avion pou Hajj et Umrah. Sa c'est bane mesures ki ti bizin être favorables pour bane musulmans. Mais Soodhun oublier vite, mais laisse nous rappelle li sa domaine ki sa même Aneerood Jugnauth fine faire envers la Communauté Musulmane. Couma capave oublier sa du jour au lendemain ? Ene règne kot musulman ti black-listed. Ene règne kot ene musulman si li pé cherche travail dans service civil, li bizin pas donne so vrai l'adresse si li habite dans circonscription musulman et li soutenir ene l'autre parti politique.

Ene règne kot le secteur privé ti appelé à boycotte la Communauté Musulmane surtout dans le domaine de l'emploi. Ene règne kot bane gradués de la Communauté Musulmane ti bizin vine bane ti marchands ambulants pou zoinde deux boute. Ti ena ene politique de vengeance envers la Communauté Musulmane juste à cause pas ti vote li. C'est sa même politique de vengeance là ki li pé appliquer envers so bane adversaires politique azordi. Ti ena l'opération « *arrache mauvais l'herbe* » et « *saute les doigts* ». Fine ena l'épisode l'humiliation nous bane Hajeés à l'aéroport. Après tant bananés, kan li fine ré-vine au pouvoir so mentalité envers la Communauté Musulmane pas fine changer ditout.

Si ou guette l'affaire Rawat c'est ene cas flagrant. Kan à Soodhun, si li et so alentour pé bénéficier de l'état, c'est pas l'*Ummah*, mais seulement détrois dimounes. Ki sanlà fine crée marchand ambulante? Musulmans c'est pas ene race voleur ou mendiants! Li fine préfère travail lors coltar, la pluie, soleil, gagne coute mattraque, au lieu ki li alle cocain pou vivre. Ki reconnaissance Soodhun pé causer? C'est triste pou trouve ene musulman dénigrer et insulter so propre communauté. Si li, li fine bizin courber devant Aneerood Jugnauth, allant jusqu'à vote contre la loi Allah pou faire so chef plaisir, mais li pas bizin expecte ki la Communauté Musulmane pou suivre so mauvais l'exemple là. Quant à nous, c'est juste devant nous Créateur ki nous courber, non pas devant créatures.

Quand à la question ki billet Umrah fine baisser c'est faux. Mo même mo fine paye billet Umrah pli cher ki li pé prétendre ki soi-disant sa Gouvernement fine faire belle faveur, fine baisse billet Umrah. Li pas conner couma li pou flatte sa Gouvernement là. Kan à la viande bœuf, c'est pas juste musulman ki manger, c'est ene mesure pour toute l'île Maurice. Au niveau social, la drogue encore pé donne bal dans l'endroit kot bane minorités rester et aussi kot bane musulmans rester, kot sa la drogue synthétique là pé faire ravage parmi bane jeunesse, kot sa pé fini nous bane jeunesse. Marchands ambulants encore pé gagne crazer. Combien musulmans fine prend dans service civil dans sa 5 ans au pouvoir là?

Ki reconnaissance to pé causer Soodhun? To fine trouve le départ de Aneerood Jugnauth fine ene coup dur. Malgré to président de sa parti MSM là, zot pas fine reconnaissant même envers toi pou céki to fine faire ki pendant 35 ans to fine être avec Aneerood Jugnauth. Azordi so garçon Pravind fine prend so place et li pas fine donne toi ticket même pou to poser pou élection générale. Donc, céki to causer, tender céki to dire ki to causer ; triste pou toi, to fine donne créature plisse l'importance ki le Créateur.

Moi mo conseil sa bane musulmans ki fine quitte zot parti pou alle rode zot l'avantage dans sa parti politique là, li pou servi zot pou élection seulement pou gagne vote musulmans. Là aussi zot pas tire leçon ki fine arriver après élection 2014, kot Madame La Présidente et bane les zot ministres musulmans et députés musulmans fine gagne humiliation. Zot aussi pou arrive zot pareil après ki so garçon maintenant pour bien servi zot (après papa vine piti) pou gagne vote la Communauté Musulmane, seulement pou vine au pouvoir et après guette ki pou arrive zot.

Moi mo pas attacher avec sa Gouvernement là ou à n'importe ki parti politique, mais comme ene citoyen dans sa ti l'île Maurice là et mo content mo pays et par la grâce d'Allah, avec *duah* Allah (swt) fine montrer moi beaucoup kitchoses pou tous bane ki supporte sa Gouvernement là, ki pé manifester, pé alle lève pavillon, pé rentre dans cercle sa bane politiciens là seulement pou zot propre bien-être et bien-être zot familles, zot dimounes. Et pas oublier après élection 2014, beaucoup ti écoute sa Gouvernement là et fine embéter avec augmentation pension vieillesse. Ou fine trouve 5 ans la misère, z'éclaire.

Tous les jours, à travers media fine tender ki kantité dimounes pé souffère. Pourvu zot, zot pé faire *Maja Karo* ! La même en plein campagne électoral ou pé tender sa série scandale ki lors sa Gouvernement là et ou, bane musulmans, Allah (swt) fine dire ou bizin combattre la corruption, mensonge, dominaire, amuser avec l'argent bane contribuables ki pé paye taxes et lors chaque kitchose nous acheter, ki li manger et boire, linge etc., etc., la liste là pou trop longue... Nous paye taxes lors tous sa là. Kot ou la foi (*Iman*) pou Allah et So Rassool (saws) fine aller ? Kot sa bane l'enseignement ki Allah (swt) fine révéler dans Quran? Ou pé préfère soutenir sa bane kalité partis là, et ou vire le dos avec Allah So l'enseignement seulement pou ou propre l'avantage.

Déjà sa parti politique là li antimusulmane, mo pé donne zot ene conseil, Ô bane frères et sœurs musulmans, céki mo conner, mo conner ; céki zot pas conner, mo pas communaliste, ni raciste, ni mo pé contre sa Gouvernement là. Zot tous conner pendant sa 5 ans là couma bane minorités fine souffère avec li. Juste ene ti poignée ki fine vine so esclaves, ki tire certain l'avantage avec li, sinon tous promotion, tous *Maja Karo* seulement pour so famille, ti copain, ti copine et li protège so majorité kot li mette sa dans zot l'esprit ki c'est seulement zot ki bizin dirige sa pays là.

Donc, ene conseil, retire zot de sa parti là le plus vite possible avec la tête haute, *Insha-Allah*. Sa li pou meilleur pou ou, pou ou famille, pou sa communauté musulmane en générale. Allah et So Rassool fine faire nous bien comprend ki la vie dans sa le monde là, bane jouissances sa le monde là, la guerre pouvoir, li ene paradis pou bane *Kuffar* et pou bane croyants, pou nous li ene l'enfer. Nous souffère oui, mais temporaire et c'est dans *Aakhérat* ki Allah fine réserve le meilleur paradis éternel pou bane croyants.

Alors laisse zot amuser, faire céki zot envie. Quant à nous, nous faire *duah* mais jour Allah (swt) attrape zot, zot pou gagne ene tel humiliation et ene tel punition divine ki pou bien grave. Reste kot ou été, établir ou l'amour avec Allah et So Rassool, travail pou Allah So *Deen*. Céki ou pou gagner, bane récompenses ici-bas et dans l'au-delà pou pli grand encore. Pense ene coup, si sa [gouvernement sortant là] révine au pouvoir, ki kalité misère pendant sa 5 ans à venir là ou pou passer kot sa bane là pou jouir et remplie zot poche. Dans zot la bouche, zot grand parole sa ki zot ouler servi zot pays, travail pou rende ou la vie facile, mais kan ou faire ene bilan après 5 ans, c'est tout le contraire.

Donc, dans ene tel kalité politique kot ou pas pé baze ou lors l'enseignement divine, kot ou quitte l'enseignement divine pou faire ene pli faille politique, ou attrape l'enseignement bane *Kuffar* pou faire di tort l'*Ummah*. Couma li grave sa. Donc, guette l'*Ummah* avant tous, pas guette ou bien-être pou quelque mois ou semaine, kot après pou mette ou out après élection, après ki fine vine au pouvoir. Donc, sorti dans sa kalité politique là, la tête haute, pas alle attire la colère d'Allah. Conne choisir ou chemin. Écoute céki mo pé dire. Alle appranne couma pou vine bane bons politiciens musulmans, ki préserve bane valeurs de l'Islam et aussi séki important aussi comme ene citoyen de sa pays là, ou travaille la tête haute, la main propre pou tout le pays, en tant ki ene vrai serviteur de Dieu, ki travaille pour le bien-être de l'humanité, pour tous le peuple Mauricien.

Ou trouver couma ouvertement le Hindu House pé demande le Premier Ministre sortant pou protège zot racine et zot fine rassure li de zot soutient. Couma appelle sa, pas communale sa? Et pé dire sa devant le P.M ; Kan bane minorités lève zot la voix pou demande zot droit, à ce moment là sa bane dimounes là zot considérer comme communale. *Shame* (La honte) lors sa bane politiciens musulmans ki embête la Communauté Musulmane à chaque élection et ene fois élus, c'est bane pure **JUDAS** ; zot montrer zot vrais visages d'hypocrites.

Avec élection ki pé vini, mo demande la femme musulmane : garde ou l'honneur et ou dignité, pas ranne ou cheap (bas). Premièrement, c'est pas ou place sa pou alle dans bane congrès ou les autres rencontres de n'importe ki parti politique. Li pas permette pou mette ou présence dans sa bane kalité réunions là. Péna aucaine récompense à gagner là-dans, c'est plutôt ene désobéissance pure et simple.

À cause de trois sœurs de la Communauté Musulmane, par l'ignorance zot mette zot présence dans sa bane congrès là et les autres rencontres *Jaahil*, et alors c'est toute ene communauté ki être humilier. Politiciens li servi de sa bane détours musulmans là pou montrer ki tous communautés avec li. Pli pire ena tire selfie avec politicien ki pas zot *Mahraam*. Li *Haram* sa kitchose là. Zot pas gagne enn-ti-pé la honte, pli pire ena mette la main lors z'épaule z'homme étranger (ki li P.M ou ministres) pou tire photo. Encore c'est *Haram* même si ou fine mette ou *Misar* ou *Hijab* ou *Jilbaab* bien, c'est *Haram* pou faire sa bane actions là. Pli pire ena couvert figure tire selfie avec z'homme étranger.

Nous bane frères bizin pas laisse nous bane sœurs être exploité par zot l'ignorance par bane politiciens. Faire zot garde zot l'honneur. À cause quelques sous faudré pas ou vende ou l'honneur. Montrer ki ou ene dimoune respectable. Bane sœurs dans sa bane congrès là péna aucaine cause islamique ki ou pé défanne. Pas rende ou cheap. Parfois bane vieux, vieux dimoune, trouver couma zot être exploité avec ene ti billet Rs. 100 pou être présent dans sa bane congrès là. Nous tous nous pé marche avec nous la mort, et si mort dans ene place kot péna l'obéissance Allah, ki compte ena pou alle render?

Nous lance ene l'appel à nous bane sœurs pou pas laisse zot exploiter par bane politiciens. Mette bien dans la tête ki système *Kuffar* jamais pou vine pou OU. Lutter et dépense ou richesse et ou l'énergie pou cherche le plaisir d'Allah, non pas pou implémente le système *Twaghout* lors la terre Allah.

Ena pas mal de politiciens ki vivre la nuit, li jour dans désobéissance Allah à travers la boisson alcooliques, discothèques, l'adultère, jeu du hasard, consommation la chaire *Haram*. Eski tout sa ki pou amène succès et réussite de l'*Ummah*? Garde nous confiance entièrement en Allah. Pas à cause quelques têtes brûler dans l'*Ummah*, ki gâte l'image de l'Islam sur le plan politique et en générale, ki faire bane kitchoses détestables, ki ou aussi ou laisse ou berner [c'est-à-dire, embêter] par zot bane promesses ki zot pou amène confort et réforme pou bane musulmans. Et pas laisse les autres aussi vine servi nous pou zot propre l'intérêt. Pas laisse zot vine acheter ou conscience avec bane kitchoses mondaines.

Si certains politiciens fine acheté certaines communautés avec l'argent, la boisson alcooliques ou d'autres choses encore, ou, faudré pas ou tombe dans la bassesse

de sa bane communautés là. Garde ou la tête haute. Faudré pas ou déssane ou « *cheap* » à cause quelques sous. Céki nous pé trouver ces derniers temps, ene groupe dans la communauté pé entraîne sa communauté là dans la désobéissance Allah juste pou faire zot « **LEADER** » [Oui, zot leader politique, car nous, bane musulmans, nous vrai leader, le leader de l'*Ummah* c'est le Saint Prophète Muhammad (saws), et c'est Allah et So Rassool (saws) ki nous bizin faire plaisir, en établissant le vrai l'islam dans sakaine de nous bane actions, comportements et paroles. Nous l'intention aussi bizin pure.]

Nous dire sa bane frères là, peur Allah, pou sa vilain jouer ki zot pé jouer là. Tous saki fine accepter l'islam comme religion, li pou bizin rende compte pou tous actions ki li fine faire lors sa la terre là, ki li travail comme ministre ou député car le verset Quran li clair: « **Co-opérer dans le bien et dans la frayeur d'Allah mais pas co-opérer dans péché et l'ennemité.** » (Al-Maida 5 : 3).

Ki Allah purifier zot l'intelligence et amène zot tous dans l'*Ummah* plus près ki sa lors le droit chemin. *Ameen.*

Ô Allah, pardonne nous et protège l'*Ummah Muhammadiya* (saws) contre la dégradation et protège bane vrais musulmans et aide nous tous ensam comme ene sel le corps pou rétablir To *Deen* lors la terre. *Ameen.*

« Wa Man asaa-nii Fa-innaka Ghafuurur Rahim »

C'est Toi [O Allah] ki plein de pardon et de pitié.

(Ibrahim 14 : 37)